

Ed fed suq liq

Awg meh he lehq phehq peg che awg lawn

Ed fed suq med vawr, awg yand u ve khuhn Ar siq muhd mig nehax ghod che muhd ni kehg phawd awr cawg che a yed ir jad che med ted mag phehq che yaog. (A meha Tu ra ki muhd mig yaog). Awg lawn ghod ver Ed fed suq med awr lehr, tad kag nag khaex te daq che yaq kaw khad laex khad phanr kae kig phehq cheaq te lehq, tad kag te daq kig awg cuhz penr nux phehq vehr che yaog. U ve lehax ma hez ser, Ed fed suq med u ve khuhn awg meh buhg jad che Rod maq chaw a kor pi che awg lid khuhn ve ghig sa ma Dai nag sax ho ve bon yehg nux liz te tand lar che yaog. (Her lar saq khuhd ver, A te miq lehd koz che yaog). Pawd lod Ed fed suq med haq yawd ved kanx te kig awg cuhz penr te lar lehq med che khuhq seh khuhq kha gag chehd lehq ha lehg che bon khuhd mar che yaog. Liq che ve te koz vawr, Ed fed suq med khuhn chehd che Khreq yad awg mor haq lehax fe vid che ma hez hawg. Pawd loq yawd sehr pawz te pawz huh ha lehg che bon khuhd ca maer kig Ar siq muhd mig khuhn ve med teq pa khuhn cawg che Khreq yad awg mor teq pa haq liz fe vid lar che gha hawg.

Buhq var he lehq buhq che awg yand

A.D. 60 khuhq thad huh, cuh yad Pawd loq Rod maq med nux lo nid khuhq thawnr khuhn chehd

thad huh, yawd buhq lar che yaog lehd chaw
mad awr ve koz che yaog.

*A yed ir che awg lawn he lehq awg lawn kha
peg*

Ed fed suq liq che ve te koz vawr, Pawd loq buhq lar che awg kag awg nuz awr ve liq haq pen daq lehq ma hez hez che mar khad he lehq mar yaq che awg ceng teq pa haq caz daq che awg lawn haq yawd mad buhq lar. Kheh ma khuhd, Ghig sa ve co co taer taer te che awg bon awg sinx he lehq duhd law che ted ceng khawd-ehg kheh taw maq kuhg, khawd-ehg kheh taw maq nax che haq ghawn par teq pa kha sehax na gha lehq, Ghig sa Khreq yad awg mor awg pun muh jad daq jad che duhd law lar che awg ceng teq pa haq liz i hehd ve ni ma sir khuhn kha nehax sir gha tug awg pun Pawd loq buhq lar che yaog. Liq che ve te koz awg khuhn a yed ir jad che ted ceng liz, teq mor ted chuhq ax lehax te che awg lawn haq buhq lar che yaog. U ve awr lehr, Khreq yad gha lia Ghig sa ve ted yehg yad ka yad lehax phehq che yaog. Kheh te cheaq te lehq, te ghad he lehq te ghad haq daq cawd che yaog. Che nuz awr liz yawd Khreq yad awg mor awg lawn kawq buhq lar che yaog. Khreq yad awg mor ghod che awr lehr, te lar che bon lawg kig yehg haq koz che ma hez. Khreq yad awg mor awr lehr, chaw mawd, yad nehg, haw khaz, yad mid, Khreq yad kha phehq che chaw awg gha lia haq koz che yaog.

Awg lawn nux

1. Awg kawd ve tawd (1:1-2)

2. Khreq ve awg miq awg phond he lehq Khreq yad awg mor ve a kor sir phehq che Khreq (1:3-14)
3. Khreq yad teq pa Ghig sa ve kand pax he lehq Ghig sa ve duhd law che ted ceng haq kha sehax sir tug awg pun Pawd loq bon lawg vid che (1:15-23)
4. Ghig sa duhd law lar che lo geh gha tug awg khad teq pa (2:1-3:21)
5. Khreq yad awg mor awg khuhn Ghig sa duhd law lar che haq te peh lawq gha tug awg khad (4:1-6:20)
6. Awg leh med ve tawd (6:21-24)

Awg chawd teq pa haq duhd nuhd che tawd

¹ Ghig sa ve a lor cawd cheaq te lehq, Yer suq Khreq ve cuh yad phehq che ngag Pawd loq awr Lehr, Ed fed suq med khuhn chehd che Khreq yad phehq lehq Yer suq Khreq haq yonr yeg che chaw teq pa haq liq che te koz buhq fea che yaog. ² A nig ved Awr pa Ghig sa he lehq Jawd mawd Yer suq Khreq ve awg bon awg sinx* he lehq duhd sa gad sa tug nig hehd geh cawg vid-oq.

Yer suq haq te lehq awg bon gha che awg lawn

³ A nig ved Jawd mawd Yer suq Khreq ve Awr pa Ghig sa haq chid muh-oq. Yawd awr Lehr, co ha phawd awr awg pun muhd nuh maq haq caz daq che awg bon awg ceng gha lia, Khreq haq cud lehq a nig haq naq ax peor. ⁴ Mig gig maq te phanr ser thad loar, Ghig sa awr Lehr, Khreq awg

* ^{1:2} 1:2 awg bon awg sinx Gal 1:3 haq ngawx.

khuhn lo a nig haq lez yug lar peor.[†] A nig awr Lehr, yawd mehz khuhd Suhr daq kehg che chaw he lehq yaq kig mad cawg che chaw gha phehq tug, yawd a nig haq lez yug lar che yaog.

⁵ Yer suq Khreq haq te lehq a nig Ghig sa ve awg yad phehaq tug, awg kawd thad loar yawd a nig haq haq lehq fir teh lar peor. Che kheh te tug, Ghig sa yawd ni ma cawd che yaog. ⁶ Yawd ved awg bon haq chid muh tug, Ghig sa haq jad che yawd ved Yad phu awg khuhn, awg mig awg phond cawg che yawd ved awg bon a nig haq yawd pehar lar che yaog. ⁷ Yad phu ve awg Suhr haq te lehq, yawd awg khuhn a nig thaer khuhq che[‡] haq gha peor. Yer suq yawd ved awg bon ir jad mad jad cheaq te lehq, a nig ved yaq kig jiz kig teq pa haq yawd phehd kha ax che yaog.

⁸ Cud yiq ma yiq he lehq sir vix che awg ceng gha lia khuhn lo lehax, Ghig sa ve awg bon a nig haq sang te sang mad-ag tug yawd tea che yaog. ⁹ Kheh te cheaq te lehq, pong lag thad Ghig sa ve a lor awr Lehr khuhd ceh lar che liz, a meha a nig haq Ghig sa yawd pheq mar ax peor. Yer suq haq cud lehq che kheh te tug yawd ni ma cawd che yaog. ¹⁰ Khawd-ehg kheh le lehd koz ver, awg yand gag vehr che te yand, muhd muh maq lo cawg che awg ceng gha lia lehd ma koz, mig gig khod-aq lo cawg che awg ceng gha lia lehd ma koz, Ghig sa cuhx daq caz daq vid lehq, Khreq

[†] **1:4** 1:4 lez yug lar peor Ghig sa ve chaw te lar peg che haq koz gad che yaog. Rm 11:5 [‡] **1:7** 1:7 thaer khuhq che Vend bax awg khuhn suh chehd che chaw teq pa haq Yer suq ve awg Suhr chuhd phu vid che haq koz che yaog. 1Pt 1:18-19

haq uq penr cuh tug yaog.

¹¹ Yer suq Khreq haq te lehq, a nig liz Ghig sa ve chaw phehq che yaog. Yawd a lor cawd che khuhn awg gha lia haq yawd te lar che yaog. Ghig sa awr lehr, yawd duhd lar che heh, awg kawd thad liz a nig haq fir teh lar peor. ¹² Khreq haq awg kawd duhd law lar che§ ngag hehd teq pa awr lehr, yawd ved awg mig awg phond haq chid muh tug awg pun, yawd ngag hehd haq fir teh lar peor.

¹³ Nig hehd liz, nig hehd gha pong che awg lawn ha lehg che bon khuhd lehd koz che, thed che cawd che tawd khuhd haq gha kad peg lehq, Yer suq Khreq haq yonr vehr khaz nuhr, peha tug yaog lehd koz lar che Daq che kehg che Awg ha phu haq cud lehq, Ghig sa nig hehd haq maex lar peor.* ¹⁴ Ghig sa a nig haq pong ax thad kha gag, Ghig sa ve awg sinx haq a nig gha cad tug haq sir vid tug, a meha liz Daq che kehg che Awg ha phu a nig haq pehar lar peor.† Che awr lehr, yawd ved awg mig awg phond haq a nig chid muh tug awg pun yaog.

I hehd duhd sir duhd pawnr tug bon lawg che

¹⁵ Kheh te cheaq te lehq, nig hehd Jawd mawd Yer suq haq yonr lehq, Khreq yad teq pa awg gha lia haq haq che awg lawn ngag gha kad peor.

§ **1:12** 1:12 Khreq haq awg kawd duhd law lar che Yud daq chaw teq pa haq koz che yaog. * **1:13** 1:13 nig hehd haq maex lar peor Ghig sa ve chaw phehq vehor lehd koz gad che yaog. † **1:14** 1:14 Awg ha phu a nig haq pehar lar peor Awg ha phu pehar che awr lehr, Ghig sa ve chaw phehq vehr che sax khiz phehq che yaog.

¹⁶ Kheh te lehq, nig hehd haq te lehq ngag Ghig sa haq khar thad liz chid muh lehq, nig hehd awg pun bon lawg chehd che yaog. ¹⁷ Ngag bon lawg thad, awg mig awg phond ir che Awr pa phehq che, a nig ved Jawd mawd Yer suq Khreq ve Ghig sa awr lehr, yawd ved awg lawn haq nig hehd sir tug, duhd sir vix che ni ma he lehq pheq mar che teq pa haq sir vix che ni ma yawd nig hehd haq pid tug ngag lawg che yaog. ¹⁸ Yawd nig hehd haq kug yug cheaq te lehq, duhd law tug khawd-ehg kheh cawg che lehd ma koz, Khreq yad teq pa gha tug awg sinx khawd-ehg kheh ma awg mig awg phond ir jad mad jad che lehd ma koz, nig hehd ve ni ma awg khuhn kha sehax saw duhd mawg gha tug ngag bon lawg chehd che yaog. ¹⁹ Kheh te lehq, a nig kha yonr che chaw teq pa awg pun, koz mad peg thad kha gag yawd ved kand pax khawd-ehg taw maq ir jad che haq nig hehd sir tug liz, ngag bon lawg che yaog. Che ve haq Ghig sa te thad, kand pax ir jad hehnd jad che awg khuhn yawd te che yaog. ²⁰ Kand pax u ve awr lehr, Khreq haq suh kig lo kawq teq tuag vid lehq, muhd nuh maq lo Ghig sa yawd ved laq yaq awr pax awr lo[‡] yawd haq mi vid lar che yaog. ²¹ Yawd awr lehr, uq penr che phad awg gha lia, kand pax ir che phad awg gha lia, awg ghad ir che phad awg gha lia, jawd mawd awg gha lia he lehq awg meh kha cawg lar che awg gha lia, che teq co haq lehd ma koz, awg khaz nuhr teq co haq lehd ma koz, che awg gha lia

[‡] **1:20** 1:20 laq yaq awr pax awr lo Awg ghad ir lehq awg mig awg phond cawg che haq koz che yaog.

thag lo yawd ir jad muh jad che yaog. ²² Awg ceng gha lia haq yawd awg huhx lo Ghig sa teh lar lehq, Khreq yad awg mor haq kha caz daq che awg gha lia awg thag lo yawd haq a kor phehq vid che yaog. ²³ Khreq yad awg mor awr lehr, Yer suq ve awg ton yaog. Khreq yad awg mor awg khuhn Khreq peh lawq chehd lehq awg gha lia haq yawd peh lawq vid che yaog.

2

Ghig sa ve bon haq te lehq thaer khuhq che haq gha che

¹ Nig hehd awr lehr, te yaq kig he lehq vend bax teq pa awg khuhn suh chehd che te yand, yawd nig hehd haq kawq teq tuag vid che yaog. ² Pong lag thad nig hehd mig gig ve awg lid awg khad teq pa awg khad haq kae che awg khuhn, vend bax teq pa haq te che yaog. Awg yand u ve haq, muhd-aq lo ve kand pax haq uq penr che phad* awg khad haq liz nig hehd kae che yaog. Yawd awr lehr, maq na yug che chaw teq pa ve ni ma awg khuhn kanx te che awg ha phehq che yaog. ³ Awg yand u ve haq, a nig awg gha lia liz maq na yug che chaw teq pa geh teq geha chehd lehq, awg suhr awg sar ni khaz suh tug te cheaq te lehq, awg suhr awg sar te gad che heh te che lehd ma koz, duhd lar che heh te che lehd ma koz, a nig te che yaog. Kheh te lehq, awg kag awr ve chaw teq pa heh te lehq, a nig awr lehr nez nag

* **2:2** 2:2 uq penr sehr phad Ned haeg haq koz che yaog. Yh 14:30.

che haq gha khanr che chaw teq pa phehq cehg mag che yaog.

⁴ Kheh ma khuhd, har kax vix jad che Ghig sa awr lehr, yawd ved haq pehnd ir jad che awg khuhn a nig haq haq cheaq te lehq, ⁵ vend bax teq pa awg khuhn a nig suh chehd che[†] liz, Khreq geh teq geha yawd a nig haq kawq teq tuag vid peor. (Ghig sa ve awg bon haq te lehq nig hehd thaer khuhq che haq gha vehor.) ⁶ Ghig sa awr lehr, Yer suq Khreq geh teq geha a nig haq kawq teq tuag vid lehq, yawd haq te lehq muhd nuh maq ve chehd kig awg khuhn a nig haq yawd geh mi cuha che yaog. ⁷ Yawd che kheh te che awr lehr, Yer suq Khreq haq te lehq yawd a nig haq har kax ax che awg khuhn, awg khaz nuhr lag tug te yand khuhn, yawd ved awg bon khawdehg ma ir jad mad jad che haq pheq mar ax tug awg pun te che yaog. ⁸ Awg lawn ghod ver, nig hehd yonr che awg khuhn Ghig sa ve awg bon haq te lehq nig hehd thaer khuhq che haq gha che yaog. Nig hehd khad nig hehd te che haq te lehq gha che ma hez. Ghig sa pehar che laq sawnr phehq che yaog. ⁹ Chaw te ghad-eg liz ni ma maq gha ir tug, kanx te cheaq te lehq[‡] gha che ma hez. ¹⁰ Awg lawn ghod ver, a nig haq yawd tea lar che yaog. A nig daq che kanx teq pa haq te tug, Yer suq Khreq awg khuhn yawd a nig haq phanr lar che yaog. Daq che kanx u ve teq pa haq a nig te kae tug awg pun awg kawd

[†] 2:5 2:5 a nig suh chehd che Awg ton suh che haq koz che ma hez. Co ha suh che haq koz che yaog. [‡] 2:9 2:9 kanx te cheaq te lehq Daq che kanx awr lehr, chaw yad ve vend bax haq chuhd kha maq gha.

maq thad loar Ghig sa ghu lar peor.

Laq kan haq te lehq cawd daq hawr daq vehr che

¹¹⁻¹² Kheh te lehq, awg suhr awg sar phawd awr bid saz a naz§ chaw phehq che nig hehd teq pa awr lehr, pong lag thad Khreq haq a cehax liz ma caz daq che haq duhd nuhd-og. Awg yand u ve haq, awg gig med soer che chaw teq pa awr lehr, nig hehd haq awg gig med maq soer che chaw teq pa phehq che lehd koz che yaog. Awg gig med soer che* u ve awr lehr, awg suhr awg sar phawd awr laq kuhr te che ted ceng phehq che yaog. Awg yand u ve awg khuhn nig hehd awr lehr, Id sar rer laq awg mor haq maq gha pawnd daq. Ghig sa koz lar che kar tiq sax caz tawd khuhd haq liz nig hehd ma caz daq. Nig hehd awr lehr, mig gig koar lo duhd law kig liz mad cawg lehq Ghig sa liz mad cawg che haq duhd nuhd-og. ¹³ Pong lag thad† nig hehd vid kig lo chehd che liz, a meha‡ Yer suq Khreq awg khuhn lo nig hehd awr lehr, Khreq ve awg suhr haq te lehq awg pad huh gag vehor. ¹⁴ Awg lawn ghod ver, yawd haq te lehq a nig cawd daq hawr daq che yaog. Yawd awr lehr, a nig chaw nid ceng§ phehq chehd che haq ted ceng lehax

§ **2:11-12** 2:11 bid saz a naz Yud daq chaw ma hez che awg gha lia haq bid saz a naz chaw lehd sawnr lar che yaog. * **2:11-12**
 2:11 Awg gig med soer che Gal 2:3, 5:2 haq ngawx. † **2:13** 2:13
 Pong lag thad Thaer khuhq che maq gha ser huh ve awg yand haq koz che yaog. ‡ **2:13** 2:13 a meha Thaer khuhq gha peg khaz nuhr ve awg yand haq koz che yaog. § **2:14** 2:14 chaw nid ceng Yud daq chaw he lehq bid saz a naz chaw haq koz che yaog.

phehaq vid lehq, a nig awg kanr huh ko lar che ghoq pa heh te lehq cand daq che te ceng haq yawd phaz kha vehor. ¹⁵ Yawd ved awg ton awg khuhn awg lid tawd khuhd ve awg lid awg khad he lehq tawd pid lar che teq pa haq te lug vehor. Yawd che kheh te che awr Lehr, chaw nid ceng phehq chehd che haq yawd awg khuhn chaw awg suhx te ghad phehaq lehq, cawd daq hawr daq tug te che yaog. ¹⁶ Laq kan haq te lehq, a nig chaw nid ceng haq awg ton teq ton lehax phehq che awg khuhn Ghig sa haq cawd daq hawr daq tug awg pun liz yawd te che yaog. Yawd che kheh te cheaq te lehq, cand daq che ted ceng haq yawd dawz vehr che yaog. ¹⁷ Khreq lag lehq, nig hehd vid kig lo chehd che chaw* teq pa haq lehd ma koz, ned kig huh chehd che chaw† teq pa haq lehd ma koz, cawd daq hawr daq vid tug awg lawn ha lehg che bon khuhd mar vid che yaog. ¹⁸ Awg lawn ghod ver, yawd haq te lehq a nig chaw nid ceng awr Lehr, Awg ha phu te ghad lehax awg khuhn lo Awr pa chehd lo kae tug, yaq kaw cawg lar peor.

¹⁹ Kheh te lehq, nig hehd awr Lehr, su muhd mig ve chaw mad kawq phehq. Khehx chaw liz mad kawq phehq. A meha nig hehd awr Lehr, Khreq yad teq pa geh te muhd mig awg khuhn lo lehax chehd lehq, Ghig sa ve yehg awg khuhn lo yehg yad ka yad teq pa phehq vehr che yaog. ²⁰ Nig hehd teq pa awr Lehr, Ghig sa te lar che

* ^{2:17} 2:17 vid kig lo chehd che chaw Bid saz a naz chaw teq pa haq koz chehd che yaog. † ^{2:17} 2:17 ned kig huh chehd che chaw Yud daq chaw haq koz chehd che yaog.

yehg phehq che yaog. Cuh yad teq pa he lehq Ghig sa ve cuh kar var teq pa awr lehr, awg chi he lehq awg cuhz penr phehq lehq, Yer suq Khreq awg ton vawr, awg cir lo cawg che awg cuhz penr huhx meh dig phehq vehr che yaog. ²¹ Yawd awg khuhn lo ted yehg ka maq ve saw caz daq lar lehq, Jawd mawd Yer suq Khreq awg khuhn daq kehg che bon yehg nux phehaq tug ir veh chehd che yaog. ²² Ghig sa ve Awg ha phu awg pun chehd kig phehq tug yawd awr lehr, nig hehd haq yug lehq yehg u ve haq te chehd che yaog.

3

Pawd loq bid saz a naz chaw teq pa awg pun kanx te che awg lawn

¹ Awg lawn u ve haq te lehq, ngag Pawd loq awr lehr, nig hehd bid saz a naz chaw teq pa haq ga tug Yer suq Khreq awg pun thawnr khuhn gha chehd chehd che yaog. ² Nig hehd awg pun Ghig sa ve awg bon khuhn kanx che ve ngag haq pehar lar peg che haq nig hehd gha sir gha kad peg che yaog. ³ Ngag nig hehd haq liq ngeh che khuhn buhq ax peg che heh, Ghig sa khuhd ceh lar che awg ceng* teq pa ngag haq pheq mar ax cheaq te lehq, ngag gha sir che yaog lehz nig hehd sir chehd che yaog. ⁴ Liq che haq nig hehd ghawn chehd che te yand, Khreq haq caz daq che khuhd ceh lar che awg ceng haq ngag kha nehax sir che yaog lehz, nig hehd gha sir tug yaog. ⁵ Khuhd ceh lar che awg ceng u ve awg

* **3:3** 3:3 khuhd ceh lar che awg ceng 1:9, Kaw 1:26-27 haq ngawx.

lawn, pong lag thad ve chaw teq pa haq maq sir vid che liz, a meha ve awg yand awg khuhn Awg ha phu awr lehr, Ghig sa ve daq kehg che cuh yad teq pa he lehq cuh kar var teq pa haq pheq mar vid lar che yaog. ⁶ Khuhd ceh lar che awg ceng u ve awr lehr, che kheh yaog. Ha lehg che bon khuhd haq te lehq, bid saz a naz chaw teq pa awr lehr, Yer suq Khreq awg khuhn lo Yud daq chaw teq pa geh teq geha awg sinx gha cad che, i hehd geh awg ton teq ton lehax phehaq lehq, pid lar che kar tiq sax caz haq i hehd geh teq geha gha che yaog.

⁷ Ghig sa yawd ved awg bon ngag haq kheha pehar che heh te lehq, ha lehg che bon khuhd che su haq mar vid tug yawd ngag haq te cuha che yaog. Yawd ved laq sawnr[†] che haq ngag gha che awr lehr, yawd ved kand pax awg khuhn lo yawd tea cheaq te lehq gha che yaog. ⁸ Khreq awg khuhn cawg che peh lawq jad mad jad che awg bon awg lawn teq pa bid saz a naz chaw teq pa haq bon mar vid tug, Khreq yad teq pa awg gha lia awg khuhn ngag su haq keh i che chaw te ghad phehq liz, awg bon che ve yawd ngag haq pehar che yaog. ⁹ Ghig sa ve khuhd ceh lar che awg ceng awg lawn chaw awg gha lia haq kha sehax pheq mar vid gha tug awg pun liz, awg bon che ve haq ngag gha che yaog. Khuhd ceh lar che awg ceng u ve awr lehr, awg gha lia haq te phanr che Ghig sa awg khuhn, a mig thad loar liz khuhd ceh lar che yaog. ¹⁰ A thoq awg pun khuhd ceh lar che awg le lehd koz ver, Ghig sa

[†] 3:7 3:7 Yawd ved laq sawnr Ha lehg che bon khuhd mar che kanx haq koz che yaog.

ve cud yi^q ma yi^q[‡] khawd-ehg ma ir jad mad jad che awg lawn Khreq yad awg mor haq cud lehq muhd-aq lo chehd che uq penr che phad he lehq kand pax cawg che phad teq pa haq a meha sir vid tug awg pun, awg yand u ve haq yawd khuhd ceh lar che yaog. ¹¹ Che kheh te che awr lehr, mig gig maq te phanr ser thad liz yawd duhd law lar che heh, a nig ved Jawd mawd Yer suq Khreq awg khuhn phehaq vid tug awg pun yawd te che yaog. ¹² Jawd mawd Yer suq Khreq awg khuhn lo a nig ni ma tag che khuhn te lehq, yawd haq yonr che haq te lehq, ma kuhz che awg khuhn a nig Ghig sa mehz khuhd suhr kae gag che yaog. ¹³ Kheh te cheaq te lehq, nig hehd awg pun ngag gha tuq gha khanr che[§] teq pa haq te lehq nig hehd ni ma maq gha lug tug, ngag lawg khawx che yaog. Tuq che khanr che che teq pa awr lehr, nig hehd awg pun awg mig awg phond gha che yaog.

Sir mad gag ser che haq pehnd che haq sir tug bon lawg che

¹⁴ Awg lawn che haq te lehq, Awr pa mehz khuhd suhr ngag nar khehr teh mi lehq bon lawg che yaog. ¹⁵ Yawd awr lehr, muhd nuh maq lo chehd che he lehq mig gig koar lo chehd che awg gha lia awg thag lo Awr pa phehq che yaog. ¹⁶ Ngag bon lawg che awr lehr, Ghig sa ve awg mig awg phond ir jad mad jad che heh, yawd

^{‡ 3:10} 3:10 Ghig sa ve cud yi^q ma yi^q Chaw yad haq vend bax khuhn pong vid tug, Yer suq haq mig gig khod-aq lo peha lar che haq koz gad che yaog. ^{§ 3:13} 3:13 gha tuq gha khanr che Thawnr awg khuhn lo gha chehd che haq koz che yaog. 3:1

ved Awg ha phu haq te lehq nig hehd ve ni ma awg khuhn kand pax haq yawd yehd lehq, awg ghad cawg vid tug lehd ma koz,¹⁷⁻¹⁸ nig hehd yonr che haq te lehq Khreq nig hehd ve ni ma awg khuhn chehd yeg tug lehd ma koz, ngag lawg che yaog. Haq pehnd che awg khuhn nig hehd awg chi cuhz nax lehq awg cuhz penr yeg cheaq te lehq, Khreq yad teq pa awg gha lia geh teq geha Khreq ve haq pehnd che khawd-ehg taw maq kuhg che, khawd-ehg taw maq yehg che, khawd-ehg taw maq muh che he lehq khawd-ehg taw maq nax che haq nig hehd liz kha nehax sir gha vid tug awg pun liz ngag bon lawg che yaog.¹⁹ Chaw yad sir mad gag che Khreq ve haq pehnd che haq nig hehd sir tug awg pun liz ngag bon lawg chehd che yaog. U kheh te sir ver, Ghig sa ve peh lawq che awg ceng gha lia nig hehd awg khuhn phehaq vid tug yaog.

²⁰ Ghig sa ve kand pax awr lehr, a nig awg khuhn lo kanx te chehd cheaq te lehq, a nig lawg che he lehq duhd che awg gha lia haq keh lex lehq yawd mad chawa tea gha che yaog. ²¹ Khreq yad awg mor awg khuhn lehd ma koz, Yer suq Khreq awg khuhn lehd ma koz, co co taer taer khar thad liz yawd haq chid ir chid muh vid-oq. A meng.

4

Awg ha phu haq te lehq ni ma teq siar lehax te che

¹ Kheh te lehq, Jawd mawd Yer suq awg pun thawnr khuhn gha chehd che ngag awr lehr, nig hehd haq che kheh lawg khawx che yaog. Ghig

sa nig hehd haq kug Yug lar che heh, yawd kug Yug lar che haq kenr daq che awg khad haq lehax te kae-o. ² Awg ceng gha lia khuhn a sug yawd awg ton haq tar nehg che, ni ma nud nud nehg nehg che, ni ma duhd yehg gad yehg che he lehq haq pehnd che awg khuhn te ghad he lehq te ghad yeg khanr daq che, che teq pa awg khad haq te kae-o. ³ A caz kheh pheh chuhq lar che heh te lehq, cawd daq hawr daq che ted ceng nig hehd haq pheh chuhq lar che awg khuhn, Awg ha phu haq te lehq khar thad liz ni ma teq sir lehax cawg gha tug hax ceh nux tar-o. ⁴ Ghig sa nig hehd haq kug Yug lar che te yand, nig hehd duhd law kig ted ceng lehax cawg tug yawd kug Yug lar che heh te lehq, awg ton teq ton lehax cawg lehq, Awg ha phu te ghad lehax cawg che yaog. ⁵ Jawd mawd te ghad lehax,* yonr che ted ceng lehax, baz tiz sar ted ceng lehax cawg che yaog. ⁶ Chaw awg gha lia ve Awr pa te che Ghig sa te ghad lehax cawg che yaog. Yawd awr Lehr, awg gha lia awg thag lo chehd lehq, awg gha lia awg khuhn lo kanx te lehq, awg gha lia awg khuhn chehd chehd che yaog.

⁷ Khreq awr Lehr, yawd ved laq sawnr khawdehng taw maq pehar lar che heh, a nig awg gha lia awg bon kheh ma gha peor. ⁸ Kheh te lehq, Liq phu khuhn che kheh koz lar che,

†“Yawd awr Lehr muh kig lo taez che† te yand,
cand par teq pa haq yawd pheh ve lehq,

* ^{4:5} 4:5 Jawd mawd te ghad lehax Yer suq haq koz che yaog.

† ^{4:8} 4:8 Chid 68:18 † ^{4:8} 4:8 muh kig lo taez che Yer suq kawq taz koeq che haq koz che yaog. Chid 68:18, Cy 1:9

chaw yad teq pa haq laq sawnr teq pa pid che yaog,”

lehd koz lar che yaog. ⁹ Yawd taez che lehd koz che awr Lehr, awg kawd thad mig gig awg huhx ted thaeg huh yawd yaeq jaw peg che haq koz che ma hez hawg la. ¹⁰ Yaeq che te ghad awr Lehr, awg ceng gha lia haq peh lawq vid tug awg pun, muhd nuh maq awg gha lia awg thag lo taez che chaw te ghad phehq che yaog. ¹¹ Laq sawnr che ve teq pa haq yawd pid che awr Lehr, ted pehg pehar cuh yad te tug, ted pehg pehar Ghig sa ve cuh kar var te tug, ted pehg pehar ha lehg che bon khuhd mar var te tug, ted pehg pehar Khreq yad awg mor haq haq sax var te tug, ted pehg pehar mar vid var te tug, che ve teq pa te che yaog. ¹² Khreq yad teq pa haq ghu lar hanr lar lehq Khreq ve awg ton‡ ir veh yeg veh vid che kanx te vid tug awg pun laq sawnr u ve teq pa yawd pid che yaog. ¹³ A nig awg gha lia awr Lehr, yonr che awg khuhn lehd ma koz, Ghig sa ve Yad phu haq sir che awg khuhn lehd ma koz, ni ma teq sir-a lehax phehaq thad kha gag, u kheh phehq tug yaog. Kheh te lehq, a nig awr Lehr, ir vehr che chaw phehq lehq, Khreq peh lawq che heh te lehq peh lawq thad kha gag tea chehd che yaog. ¹⁴ Che kheh te ir vehr che ver, a nig chaw yad nehax mad kawq phehq lehq, laz jad che chaw teq pa cud yiq te lehq her ka che awg khuhn laex ceng haq mar che te yand, muhd huh mez chid ve che heh te lehq, a nig haq choq phawd o phawd mez chid ve gha tug ma hez.

‡ 4:12 4:12 Khreq ve awg ton Khreq yad awg mor haq koz che yaog.

15 Kheh ma khuhd, haq pehnd che awg khuhn a nig thed che cawd che tawd khuhd haq yaw lehq, Khreq awg khuhn a nig awg ceng gha lia hax ceh nux ir vehr tug yaog. Yawd awr Lehr a kor phehq che yaog. **16** A kor u ve haq caz daq che haq te lehq, awg ton teq ton maq ve ir vehr chehd lehq, haq pehnd che awg khuhn lo yeg lag chehd che yaog. Awg ton u ve awr Lehr, awg cuhx kha cawg che awg gha lia haq te lehq, teq tawn he lehq teq tawn caz daq lar lehq, awg khen ted mag peg ted mag a sug yawd ved kanx cawg che heh te cheaq te lehq, awg ton u ve ir vehr che yaog.

Khreq haq te lehq chaw awg suhx phehaq che

17 Kheh te lehq, Jawd mawd Yer suq awg khuhn lo ngag nig hehd haq che kheh koz ax lehq sax khiz khanr che yaog. Bid saz a naz chaw teq pa te che heh, nig hehd tad kawq te. I hehd duhd che teq pa awr Lehr, teq chaweh awg bon mad cawg che yaog. **18** I hehd awr Lehr, ni ma heh lehq teq chaweh maq sir cheaq te lehq, i hehd sir vix che ted ceng awg naz tud phehq vehr lehq,§ Ghig sa ve teq che ted ceng haq i hehd ma caz daq. **19** I hehd awr Lehr, yaq taw vix che ted ceng mad cawg lehq, chaq chiz che awg ceng gha lia haq te gad jad lehq, pehq che juhz che haq te tug i hehd a sug yawd awg ton chid aq vid che yaog.

20 Nig hehd awr Lehr, Khreq geh u kheh te gha hend lar che ma hez. **21** Nig hehd awr Lehr, yawd ved awg lawn haq gha kad lehq, Yer suq awg

§ **4:18** 4:18 awg naz tud phehq vehr lehq Daq che haq maq sir vix, mad mawg vix che haq koz che yaog. Yh 3:39

khuhn thed che cawd che tawd khuhd cawg lar che heh, nig hehd yawd awg khuhn lo chehd lehq gha hend lar che yaog. ²² Nig hehd ve ni ma awg pir haq kuhz chid bag lar haz-oq. Ni ma awg pir u ve awr lehr, pong lag thad nig hehd te chehd che awg lid awg khad teq pa haq caz daq lehq, nig hehd haq her ka lehq yaq vehr tug te vix che sex lae che teq pa haq te lehq, lug veh sez veh chehd che yaog. ²³ Nig hehd ve ni ma he lehq duhd khad awg khuhn lo awg suhx cawg vehr vid-oq. ²⁴ Awg cehg mag cawd che he lehq daq che kehg che awg khuhn, te phanr sehr phad Ghig sa ve awg hoq awg han heh ni ma awg suhx haq veq deh-o.

²⁵ †Keh te cheaq te lehq, her ka che tawd khuhd haq chid bag lar haz lehq, awg gha lia a sug yawd awg pad awg ki huh chehd che chaw teq pa haq awg cehg mag te che tawd khuhd lehax yaw daoq. Awg lawn ghod ver, a nig awr lehr, te ghad he lehq te ghad caz daq lar che awg khen teq pa phehq che yaog. ²⁶ †“Nig hehd nez nag liz, vend bax taq te.” Muhd ni mad kehg tand ser huh, nez nag che ted ceng haq mehx vehr vid-oq. ²⁷ Ned haeg nig hehd haq ber gha tug, yawd haq a khawag ta pid. ²⁸ Su ved med nged haq khuhd jaw che chaw tad kawq khuhd lor. Lor che chaw teq pa haq ted ceng clear ga vid gha tug, a sug yawd ved laq kuhr haq yehd lehq daq che kanx teq pa haq hax ceh nux maz teo. ²⁹ Nig hehd ve mawq kaw awg khuhn lo chaq chiz che tawd khuhd teq per-a liz ta tuhaz vid. Kheh ma

† 4:25 4:25 Ykh 8:16 † 4:26 4:26 Chid 4:4

khuhd, gha kad che chaw teq pa awg pun awg bon cawg tug, su lor chehd che awg ceng haq cawd daq che tawd lehax yaw lehq, su haq ir vid yeg vid vix che daq che tawd haq lehax yaw-og. ³⁰ Ghig sa ve Daq che kehg che Awg ha phu haq ta duhd har vid-oq. Thaer khuhq che awg ni teq ni kha gag Ghig sa nig hehd haq yawd awg khuhn lo cunr dawz lar peor.* ³¹ Su haq ni ma nag che, su haq cand che, su haq nez nag che, su haq ded daq yaq daq che he lehq su haq maq sawnr ma caz koz che, che awg gha lia haq chid bag lar haz-oq. Su haq nag tug te gad che awg ceng gha lia haq liz chid bag lar haz-oq. ³² Nig hehd te ghad he lehq te ghad daq che haq te daq lehq, te ghad he lehq te ghad har kax daoq. Ghig sa awr lehr Khreq awg khuhn lo nig hehd ve vend bax phehd kha ax peg che heh, nig hehd liz te ghad he lehq te ghad ve vend bax phehd kha daoq.

5

Awg ghiz yad heh te kae-o

¹ Kheh te lehq, nig hehd awr lehr Ghig sa haq che awg yad awg dug phehq che heh, yawd te che heh teo. ² Khreq a nig haq haq che heh, haq pehnd che awg khad haq kae-o. Yawd a nig haq haq cheaq te lehq, awg sax huhx che tand tug a nig awg pun Ghig sa haq tand vid tug, yawd ved awg ton Ghig sa haq chid aq vid che* yaog.

* **4:30** 4:30 cunr dawz lar peor Ghig sa ve chaw phehq vehor lehd koz gad che yaog. 1:13 * **5:2** 5:2 Ghig sa haq chid aq vid che Laq kan awg thag lo khanr suh che haq koz che yaog. 1:7-8

³ Hax chawd hax paz te che, chaq chiz che awg gha lia he lehq su ved med nged jeg kor haq sex lae che awr Lehr, nig hehd awg khuhn tad cawg cuh vid-oq. Khreq yad teq pa awr Lehr, awg lawn che teq pa haq maq te cawd che yaog. ⁴ Chaq chiz che tawd khuhd, cuhx kig mad cawg che tawd khuhd he lehq her ka mig daq gid che tawd khuhd, tawd khuhd che teq pa haq ta koz. Tawd khuhd u kkeh te che teq pa awr Lehr, koz maq kenr. Chid muh che tawd khuhd haq lehax yawog. ⁵ Awg lawn ghod ver, hax chawd hax paz te che chaw, chaq chiz che chaw he lehq su ved med nged jeg kor haq sex lae che chaw khar ve te ghad lehd ma koz, Khreq he lehq Ghig sa ve muhd mig awg khuhn awg sinx maq gha[†] che haq nig hehd sir chehd che yaog. (Su ved med nged haq sex lae che chaw awr Lehr, sax ho haq a kor pi che chaw haq sur daq che yaog.)

⁶ Chaw te ghad-e liz awg bon mad cawg che tawd khuhd haq yaw lehq nig hehd haq maq gha her ka yug tug sa tiq teo. Awg lawn ghod ver, awg ceng che teq pa haq te lehq Ghig sa nez nag che ted ceng awr Lehr, maq na yug che chaw teq pa geh lag che yaog. ⁷ Kkeh te lehq, i hehd haq awg chawd taq te daq. ⁸ Awg lawn ghod ver, nig hehd awg kawd thad ver awg naz tud phehq[‡] liz, a meha Jawd mawd Yer suq awg khuhn awg

[†] 5:5 awg sinx maq gha Ghig sa muhd mig awg khuhn maq gha gehe che haq koz che yaog. Pheq 21:8 [‡] 5:8 awg naz tud phehq Vend bax awg khuhn chehd lar che lehd koz gad che yaog. Rm 1:21

ghiz phehq vehr che yaog. Awg ghiz yad§ heh te kae-oq. ⁹ (Awg lawn ghod ver, awg ghiz ve awg sir awr lehr, daq che awg gha lia thed che cawd che awg gha lia he lehq awg cehg mag ve awg ceng gha lia awg khuhn cawg chehd che yaog.) ¹⁰ Jawd mawd Yer suq ni ma cawd che awg ceng haq nig hehd sir lar tug teo. ¹¹ Awg bon mad cawg che, naz hoq che kanx teq pa haq a cehax liz taq te. Kheh liz, kanx u ve teq pa ve yaq kig haq pheq tuhaz vid-oq. ¹² Awg lawn ghod ver, awg bag lo i hehd te che kanx teq pa awg lawn a nig tawd yaw che lehax liz yaq taw tug cawg che yaog. ¹³ Yaq kig haq pheq tuhaz vid che awg gha lia awr lehr, awg ghiz haq te lehq kha sehax saw mawg che yaog. Kha sehax saw tuhaz che awg ceng awg gha lia liz, awg ghiz phehq che yaog. ¹⁴ Kheh te cheaq te lehq, che kheh koz lar che, “Yuhq mir ka chehd che chaw-og, nuhd laoq.*

Suh kig lo kawq teq tu laoq.

Khreq nawg haq awg ghiz pawa tug yaog,”
lehd koz lar che yaog.

¹⁵ Kheh te lehq, nig hehd a thoq duhd a thoq te liz sa tiq kha nehax tar-oq. Cud yiq mad cawg che chaw teq pa heh taq te. Cud yiq cawg che chaw teq pa heh te chehd-oq. ¹⁶ A meha ve awg ni awg hax teq pa haeg cheaq te lehq, awg yand haq vig khuhq lehq kha nehax yehd-oq. ¹⁷ Kheh te cheaq te lehq, cud yiq mad cawg che chaw tad phehq vid. Kheh ma khuhd, Jawd mawd Yer suq ve a lor khawd-ehg kheh cawg che haq sir che chaw

§ 5:8 5:8 Awg ghiz yad Thaer khuhq gha peg che chaw haq koz gad che yaog. Rm 6:2 * 5:14 5:14 nuhd laoq Isy 26:19, 60:1 haq ngawx.

phehq vid-oq. ¹⁸ A pehx med ghig dawg buhz che taq te. U kheh te che awr lehr, chaw lug var phehq vehr che yaog. Nawg awg khuhn Awg ha phu kha peh cawg vid-oq. ¹⁹ Chid muh che tawd khuhd, ka mig khuhd he lehq co ha phawd awr haq caz daq che ka mig khuhd teq pa haq cud lehq, te ghad he lehq te ghad koz daoq. Nig hehd ve ni ma awg tawg kha gag Jawd mawd Yer suq haq ka mig chid muh-o. ²⁰ Nig hehd awr lehr, a nig ved Jawd mawd Yer suq Khreq ve awg meh haq cud lehq, awg ceng gha lia ve awg pun Awr pa Ghig sa haq khar thad liz chid muh chehd-oq.

Te ghad awg huhx lo te ghad kha nehax chehd-oq

²¹ Khreq haq yawz yan che awg khuhn, te ghad awg huhx lo te ghad kha nehax chehd-oq. ²² Awg mid ma teq paog, Jawd mawd Yer suq awg huhx lo nig hehd chehd che heh, a sug yawd ved awg phad mawd awg huhx lo chehd-oq. ²³ Awg lawn ghod ver, Khreq awr lehr yawd ved awg mor ve a kor phehq che heh, awg phad mawd liz awg mid ma ve a kor phehq che yaog. Khreq awr lehr, yawd ved awg ton phehq che Khreq yad awg mor haq Thaer khuhq vid che phad phehq che yaog. ²⁴ Khreq yad awg mor awr lehr, Khreq awg huhx lo chehd che heh, awg mid ma teq pa liz awg ceng gha lia awg khuhn a sug yawd ved awg phad mawd awg huhx lo chehd-oq.

²⁵⁻²⁶ Awg phad mawd teq paog, Khreq awr lehr, yawd ved awg mor haq haq che heh nig hehd a sug yawd ved awg mid ma haq haoq. Khreq yad awg mor daq vid kehg vid tug, Khreq awr lehr a

kaz he lehq bon khuhd haq yehd lehq Khreq yad awg mor haq chuhd kehg vid che yaog. Che kheh te tug awg pun, yawd ved awg ton chid aq vid che yaog. ²⁷ Yawd a thoq te Khreq yad awg mor haq chuhd kehg vid le lehd koz ver, daq kehg che, yaq kig mad cawg che he lehq awg kix awg hawehd heh te che ted cenr liz mad cawg che awg mor te lehq, awg mig awg phond kha peh cawg che awg khuhn, awg mor u ve yawd awg ton haq yawd chid aq vid gha tug[†] awg pun chuhd kehg vid che yaog. ²⁸ U ve heh te lehq, awg phad mawd teq pa awr lehr, a sug yawd ved awg ton haq haq che heh, a sug yawd ved awg mid ma haq haq cawd che yaog. A sug yawd ved awg mid ma haq haq che chaw awr lehr, a sug yawd awg ton haq haq che yaog. ²⁹ Awg lawn ghod ver, a sug yawd ved awg ton haq cand che chaw te ghad-eg liz mad cawg. A sug yawd awg ton haq car vid taw vid lehq, kha nehax haq sax che yaog. Khreq awr lehr, yawd ved awg mor haq u ve heh te che yaog. ³⁰ Awg lawn ghod ver, a nig awr lehr yawd awg ton ve awg khen teq pa phehq che yaog.

³¹ †“Kheh te cheaq te lehq haw khaz awr lehr,
yawd ved awr pa awr ye haq phaz daq lar
haz lehq,

yawd ved awg mid ma haq caz daq che awg
khuhn ix mag awr lehr,

teq suhr teq sar lehax phehq tug yaog.”

³² Awg lawn che awr lehr, nax jad che ted ceng
phehq che yaog. Ngag che kheh koz che awr lehr,

[†] 5:27 5:27 yawd chid aq vid gha tug Yawd ved awg mid ma phehaq vid tug lehd koz gad che yaog. Pheq 21:9 [†] 5:31 5:31 Khiz 2:24

Khreq he lehq yawd ved Khreq yad awg mor awg lawn haq koz gad che yaog. ³³ Nig hehd awg gha lia liz, a sug yawd awg ton haq haq che heh, a sug yawd awg mid ma haq haoq. Awg mid ma liz, a sug yawd ved awg phad mawd haq yawz yan-o.

6

¹ Chaw yad nehax teq paog, Jawd mawd Yer suq awg khuhn nig hehd ve awr pa awr ye ve tawd khuhd haq na yur-oq. Awg lawn ghod ver, che kheh te che awr Lehr, cawd che yaog. ²⁻³ [†]“Awg ceng gha lia nawg awg pun daq lehq, mig gig koar lo co yehg ha yehg cawg tug, nawg ved awr pa awr ye haq yawz yawz yan yan teo.” (Awg lid tawd khuhd teq pa awg khuhn lo, tawd che te khuhd awr Lehr, kar tiq pid lar che tawd awg kawd te khuhd phehq che yaog.)

⁴ Awr pa teq paog, a sug yawd ved yad teq pa haq nez nag tug taq te. Nig hehd yad hu dug hu che awg khuhn Jawd mawd Yer suq mar lar che heh i hehd haq kha nehax mar vid lehq sir kae vid-oq.

⁵ Vig lar che awg ceg* phehq che chaw teq paog, Khreq ve tawd khuhd haq na yug che heh, mig gig koar lo chehd che nig hehd ve awg sehr phad ve tawd khuhd haq kuhz ched lehq ni ma te khad lehax tar che awg khuhn na yur-oq. ⁶ Su mehz mawg kig huh lehax te che he lehq chaw

[†] **6:2-3** 6:2-3 Tuhz 20:12, Bon 5:16 * **6:5** 6:5 awg ceg U ve teq coaq thad, awg ceg teq pa haq to nud to saz heh te vig daq huhd daq tug Rod maq chaw a khawag pid lar che yaog.

yad ni khaz suh tug lehax te che ted ceng tad phehq vid-oq. Kheh liz, Khreq ve awg ceg phehq che heh, ni ma puhd che awg khuhn Ghig sa ve a lor haq teo. ⁷ Chaw yad awg pun lehax te che ma hez. Jawd mawd Yer suq awg pun te che heh, ha lehg ha ka teo. ⁸ Chaw te ghad ghad, daq che a thoq ted ceng haq te che lehd ma koz, Jawd mawd Yer suq awr Lehr, yawd haq u ve ted ceng kawq khuhq vid tug yaog. Yawd awr Lehr, su vig lar che awg ceg phehq che lehd ma koz, pong vehr che chaw phehq che lehd ma koz, Yer suq yawd haq che kheh te kawq khuhq vid tug yaog lehz sir chehd-oq.

⁹ Awg sehr phad teq paog, nig hehd liz u ve heh te lehq awg ceg teq pa haq te vid-oq. Awg lawn ghod ver, i hehd kuhz tug taq te. I hehd ve Awg sehr phad he lehq nig hehd ve Awg sehr phad te ghad lehax te lehq, yawd muhd nuh maq lo chehd chehd che yaog. Yawd awr Lehr, su ved mehz khuhd haq maq ngawx che lehz sir chehd-oq.

Ghig sa pehar che laq cax teq pa awg lawn

¹⁰ Awg leh med ve tawd te khuhd awr Lehr che kheh yaog. Jawd mawd Yer suq awg khuhn lehd ma koz, yawd ved kand pax ir jad che awg khuhn lehd ma koz, awg ghad cawg mad-ag vid-oq. ¹¹ Ned haeg her ka yug beg yug che teq pa haq nig hehd ghad vid tug, Ghig sa pehar che laq cax awg gha lia haq nig hehd veq deh lehq puhd lar-oq, ¹² Awg lawn ghod ver, a nig awr Lehr chaw yad haq gha tawr daq che ma hez. Uq penr sehr phad teq pa haq lehd ma koz, kand pax

cawg sehr phad teq pa haq lehd ma koz, a meha ve awg yand awg khuhn lo mig gig koar lo naz hoq che haq uq penr chehd che teq pa haq lehd ma koz, muhd-aq lo chehd che haeg che awg ha teq pa haq lehd ma koz, gha tawr daq che yaog. ¹³ Kheh te cheaq te lehq, haeg che awg ni awg khuhn nig hehd yeg chehd gha lehq, awg gha lia haq te peg khaz nuhr hox chehd gha tug, Ghig sa pehar che laq cax[†] awg gha lia haq yug cid lar-oq.

¹⁴ Awg cehg mag te che ted ceng nig hehd ve cuhq pehng haq chuhq lar lehq, ni ma thed che cawd che ted ceng ni ma pi haq thang tug veq deh lehq, ¹⁵ cawd daq hawr daq tug te gha che ha lehg che bon khuhd haq te lehq ghu lar hehnd lar che ted ceng khi noz cuhx che heh cuhx lar lehq hox lar-oq. ¹⁶ Kheh te lehq, haeg che awg sehr phad te ghad bawz peha che a mir toq chehd che khaz ce teq pa haq dawz vehr gha tug, thang tug haq puhd che heh, yonr che ted ceng haq puhd lar-oq. ¹⁷ Thaer khuhq che son ux cuhr haq khuhz lar lehq, Awg ha phu ve a dax haq puhd lar-oq. A dax u ve awr lehr, Ghig sa ve tawd khuhd phehq che yaog. ¹⁸ Khar thad liz bon lawg che he lehq lawg khawx che awg ceng gha lia haq, Awg ha phu awg khuhn bon lawg chehd-oq. U kheh te bon lawg tug sa tiq tar lar lehq awg ceng gha lia khuhn awg ghad ma nud lehq, Khreq yad teq pa awg gha lia awg pun bon lawg lehq law chehd-oq. ¹⁹ Ha lehg che bon khuhd haq caz daq che

[†] **6:13** 6:13 Ghig sa pehar che laq cax Co ha phawd haq caz daq che laq cax haq koz gad che yaog.

khuhd ceh lar che awg ceng haq ni ma tag che awg khuhn ngag kha sehay koz mar vid gha tug, ngag awg pun liz bon lawr-oq. ²⁰ Ha lehg che bon khuhd u ve awg pun ngag awr Lehr awg tan te sehr phad phehq lehq, son caz pheh lar che haq ngag gha khanr chehd che yaog. Ha lehg che bon khuhd u ve haq ngag mar vid kenr che heh, ni ma tag che khuhn mar vid gha tug ngag awg pun bon lawr-oq.

Awg leh med ve tawd khuhd

²¹ Ngag khawd-ehg kheh te chehd lehq khawd-ehg kheh phehq chehd che awg lawn nig hehd liz gha sir tug, ngag haq che a vix a nax Tud khiq[‡] awr Lehr awg ceng gha lia nig hehd haq koz ax tug yaog. Yawd awr Lehr, Jawd mawd Yer suq awg khuhn kar tiq yeg che kanx te sehr phad te ghad phehq che yaog. ²² Kheh te cheaq te lehq, ngag hehd khawd-ehg kheh phehq chehd che haq nig hehd sir tug he lehq yawd nig hehd ve ni ma haq awg ghad cawag vid tug, ngag yawd haq nig hehd chehd lo peha lar che yaog.

²³ A vix a nax teq pa geh duhd sa gad sa tug cawg vid-oq. Kheh te lehq, Awr pa Ghig sa he lehq Jawd mawd Yer suq Khreq pehar che haq pehnd che ted ceng he lehq yonr che ted ceng liz cawg vid-oq. ²⁴ A nig ved Jawd mawd Yer suq Khreq haq awg cehg mag haq chehd che chaw awg gha lia geh awg bon awg sinx cawg vid-oq.

[‡] **6:21** 6:21 Tud khiq Cy 20:4, Kaw 4:7-9, Tit 3:12

**Lad hur Si Liq Phu Awg Suhx
Lahu Shi: Lad hur Si Liq Phu Awg Suhx New
Testament**

copyright © 2015 Wycliffe Bible Translators, Inc.

Language: Lahu Si

Contributor: Wycliffe Bible Translators, Inc.

All rights reserved.

2020-11-18

PDF generated using Haiola and XeLaTeX on 21 Feb 2024 from source
files dated 29 Jan 2022

e3f23237-3165-58f9-84d8-20fb5acd84fe